



Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, , den 02/06/2021

Här President,

Sou wéi den Artikel 83 vun eisem Chambersreglement et virgesäit, bieden ech Iech, dës parlamentaresch Fro un d'Ministesch fir Gesondheet weiderzeleeden.

Lëtzebuerg zeechent sech duerch ee regionale Klinicke-System aus, deen aus dem CHdN am Norden, de CHEM am Süden an dem CHL an dem HRS am Zentrum besteet. Mee net all Klinik bitt all Service un. D'Ost-Regioun ass momentan keen Deel vun dësem Reseau. Esou ass zum Beispill am HRS, am CHEM zu Nidderkuer an zu Diddeleng an am ChdN zu Wolz tëscht owes 21:00 Auer a moies 7:00 Auer kee Service d'Urgence virgesinn. D'Urgence zu Nidderkuer war während e puer Woche souguer ganz zou. Bis 2024 solle méi Urgencen am Dag an Nuets op goen.

An deem Zesammenhang wéilt ech der Ministesch dës Froe stellen:

1. Wéi vill Better stinn de Patienten am **Süden** zu Verfügung? Wéi vill Better sinn dat op 10'000 Awunner gekuckt?
Wéi vill Better stinn de Patienten am **Norden** zu Verfügung? Wéi vill Better sinn dat op 10'000 Awunner gekuckt?
Wéi vill Better stinn de Patienten am **Zentrum** zu Verfügung? Wéi vill Better sinn dat op 10'000 Awunner gekuckt?
Wéi vill Better stinn de Patienten am **Osten** zu Verfügung? Wéi vill Better sinn dat op 10'000 Awunner gekuckt?
2. Wéi vill Infirmière schaffe jeeweils an de Spideeler aus dem Norden, dem Süden an dem Zentrum (an absoluten Zuelen an pro 10'000 Awunner gekuckt)?
3. Laut dem Spidolsgesetz vum 8. Mäerz 2018, ass all Spidol dozou verpflichtet e Service ze hunn, bei dem sech e Patient schrëftlech oder mëndlech bekloe kann, iwwert e Behuelen, eng Prise en charge oder allgemeng en net Respektéiere vu senger Patienterechter.
Wéi vill schrëftlech Reklamatioune goufen a säit dem 1.01.2019 an deene verschiddene Servicer vun de Spideeler agereecht?
4. Wéi zefridde respektiv onzefridde sinn d'Patienten am generelle mat de medezinesche Servicer hei am Land?



www.piraten.lu

Sinn hei Ënnerscheeder jee no Regioun festgestallt ginn? Falls jo, wat fir Grënn kéint dat hunn?

5. Duerch wéi eng anner Indicateure gëtt d'Qualitéit vun de medezinesche Servicer hei am Land erfaass a bewäert? Wat sinn d'Seuils tolérables?
6. An der Äntwert op d'Fro n°106 huet den deemolege Gesondheitsminister erkläert :
"Den Audit vun den Urgencen 2017 huet gewisen datt d'Dauer tëschent dem Triage an d'Fleeg tëschent 40 an 90 Minutte fir all Spideeler ass."
 - Wéi hunn dës Zäite säit 2017 evaluéiert (opgeschlësselt no Klinik)?
 - Wéi laang dauert d'Fleeg vun engem Patient an de Services d'Urgence am Schnëtt (opgeschlësselt no Klinik)?
 - Ass d'Ministesch zefridde mat dësen Zuelen? Wann net, wat fir Schrëtt wäerte geholl ginn, fir d'Waardezäite weider ze verréngeren?
7. Falls d'Regierung zu enger oder méi vun dëse Froen keng Ugabe ka maachen, well d'Donnéeë feelen, wéi gedenkt d'Regierung dës Lächer an der Datebank ze fëllen?

Mat déiwem Respekt,



GOERGEN Marc
Député

